

本期主持：Chen

“ 我爸是文豪！ ”

## 01

韦庄

与小女

见人初解语呕哑，不肯归眠恋小车。

一夜娇啼缘底事，为嫌衣少缕金华。

勉儿子

养尔逢多难，常忧学已迟。

辟疆为上相，何必待从师。

## 02

善哉行（残句）

曹操

痛哉世人，见欺神仙。

## 03

儿女帖

王羲之

吾有七儿一女，皆同生。婚娶以毕，唯一小者尚未婚耳。过此一婚，便得至彼。今内外孙有十六人，足慰目前，足下情至委曲，故具示。

## 04

东飞伯劳歌

## 萧衍

东飞伯劳西飞燕，黄姑织女时相见。  
谁家女儿对门居，开颜发艳照里闾。  
南窗北牖挂明光，罗帷绮帐脂粉香。  
女儿年几十五六，窈窕无双颜如玉。  
三春已暮花从风，空留可怜谁与同。

## 05

### 长安有狭斜行

庾肩吾

长安有曲陌，曲陌不容幘。  
路逢双绮襦，问君居近远。  
我居临御沟，可识不可求。  
长子登麟阁，次子侍龙楼。  
少子无高位，聊从金马游。  
三子俱来下，左右若川流。  
三子俱来人，高轩映彩旒。  
三子俱来宴，玉柱击清瓠。  
大妇褰云裘，中妇卷罗幌。  
少妇多妖艳，花钿系石榴。  
夫君且安坐，欢娱方未周。

## 06

### 大茅岭东新居忆亡子从真

顾况

谷鸟犹呼儿，山人夕沾襟。  
怀哉隔生死，怅矣徒登临。  
东门忧不入，西河遇亦深。  
古来失中道，偶向经中寻。  
大象无停轮，倏忽成古今。

其天非不幸，鍊形由太阴。  
凡欲攀云阶，譬如火铸金。  
虚室留旧札，洞房掩闲琴。  
泉源登方诸，上有空青林。  
彷彿通寤寐，萧寥邈微音。  
软草被汀洲，鲜云略浮沈。  
赫景宣叠丽，绀波响飘淋。  
石窟含云巢，迢迢耿南岑。  
悲恨自兹断，情尘讵能侵。  
真静一时变，作起唯从心。

## 07

### 摊破浣溪沙 其一

李璟

菡萏香销翠叶残，西风愁起绿波间。  
还与韶光共憔悴，不堪看。  
细雨梦回鸡塞远，小楼吹彻玉笙寒。  
多少泪珠何限恨，倚阑干。

## 08

### 摊破浣溪沙 其二

李璟

手卷真珠上玉钩，依前春恨锁重楼。  
风里落花谁是主，思悠悠。  
青鸟不传云外信，丁香空结雨中愁。  
回首绿波三峡暮，接天流。

## 09

### 浣溪沙 其七

晏殊

小阁重帘有燕过，  
晚花红片落庭莎。  
曲阑干影入凉波。  
一霎好风生翠幕，  
几回疏雨滴圆荷。  
酒醒人散得愁多。

## 10

### 喜迁莺 其三

晏殊

花不尽，柳无穷。应与我情同。  
觥船一棹百分空。何处不相逢。  
朱弦悄。知音少。天若有情应老。  
劝君看取利名场。今古梦茫茫。

## 11

### 名二子说

苏洵

轮辐盖轸，皆有职乎车，而轼独若无所为者。虽然，去轼则吾未见其为完车也。轼乎，吾惧汝之不外饰也。

天下之车莫不由辙，而言车之功者，辙不与焉。虽然，车仆马毙而患亦不及辙。是辙者，善处乎祸福之间也。辙乎，吾知免矣。